

Fonnkèr chantés et déclamés pour l'hommage à Jasmin et Géréon, le 10 Avril 2013

Saint-Denis

« Ton zyé la saroy do lo,
Fane larm an lamlamèr.
Ton sèt po té ton palto,
Ton krim té ton koulèr.
Kimm la mér fane an lékim,
Ton yèr fane an pousyèr.
Si lo van i ras la line,
Kisa la ras ton fèr..

La pa golwa mon zansyin,
Fé pa mazine a mwin in fo tan lontan.
Baya zordi sak mwin la fin
Sé arkout zistwar ton san.
Rakont a mwin koman twé la travèrs loséan,
Ton karos in kalbato avan riv dann kalbanon.
Rakont a mwin koman té dir la lwa lo blan
Lérk ou té sava maron po sap sabouk kolon.
Fé mazine a mwin
Po pa ki tronp mon zyé
Zordi i di ma bézwin
War desbassins an Bon Dyé.

Si po do moun ton kourone in zépine
dan mon kèr twé minm lo pli gran rwa.
Konm twé mon zansèt, mon rasine
Mon koulèr, mon doulèr, mi plèr an maloya.
I lav la min an pons pilat
Sinon va rod fransiz a li
Sé zistwar zésklav la soubat
Zistwar bann Eli

Sa nout zistwar, zistwar nout péi
Baya.. Bli pa li, Mazine a li soman. »

Lu par Dioxyne

Lotèr : Socko Lokaf

Avril 2013

Kontakt :

Facebook: Socko Lokaf

sockolokaf@hotmail.fr

« Si koulèr mon figir na la tras kolonyal
Langèt zot monmon la Frans bann kolon
Konèt gard ali, li riskab done aou in lanvi patrimonyal
Riskab rapèl aou in larshipèl maskarényas

Mon sovè bouklé koman rouz piké
Son gayar digdig dwa d'pyé mon bondyé
Konèt touth ali, li riskab anmar kapòr kapòr ton léspri
Ral ali dann fé nwar ton péi po wakont atwé zistwar Kabar baya sa la vi !

Si mon kèr bat rouler kan mi koz tourné viré mon péi
Sa parlfèt move désizyon patri
Tir malol dann zyé po konprann ni rod minm nout libérté
Tir malol dann zyé po konprann ni rod minm nout larmoni.

Gard amwin bien swiuplé
Mon gayar i trahi pa mwin
Mon malizé nonpli
Minm si mi vé reniyé mon lafrikinnté
Kan mon mavouz ifé gonf mon boulmankèr
Sé mon né kafrine i gonf si mon figir
Mon lèv kafrine i gonf si mon figir
E li rapèl amwin k'toulézour ifo mi transpir pou anflérir
Pars mi koné ousa i sort le zoli boutir.

Di kèl tèr la galiz somin pou mon nésans. Kèl tèr té blizé dmann pardon pou son lavans ?

In lavans an konésans zétwal. Zot zyé té i tras somin dann syèl. Té i lir domin tèlkèl

In lavans an balans

Rant sak nou wa é sak nou wa pa.

Zot té i vib, té dans an trans si lo ritm linivèr

Tèlman lo lyin la té réel, In konésans iniversèl.

Amwin mi sort laba. Mi lé la diaspora.

« Le terme diaspora désigne la dispersion d'une communauté ethnique ou d'un peuple, à travers le monde. »

Nou lé la diaspora ! Somansa, la dispersé, mé la pa semé pou anfléri.

Alor, kèl lien nou antrotien konsyaman ansanm la tèr la fè nésans nout zansèt ?

La permèt anou éné, épisa, èt la, zordi, isi é mintnan ?!

La vi yavans. Li kit pa kal in poz

Yèr, té li. Eli. Sanm son frèr Jasmin épi Géréon.

Zordi, sé nou. Zot bann zorkri.

Kinm lé pa par le san ki yansomans.

Ni tonm zot désandans

Par lo gatir, lo lien nout konsyans.

Kibor Zot léspri ilé zordi

Mi koné zot somin lé trasé. Alon kontinyé pou La Pé, Juskalavi.

Dann shak sosyété, shakinn son manyièr pansé, son manyièr war, son rézon d'krwar

Mwin midi, mon péi La Rényon na in lam, mon péi na in rev. Li grandi dan mwin éli kontant amwin in mèm...

Na pi la mizèr dan mon léspri

Na kadans la vi ek mon Fonnkèzri

Lès amwin grandi mi vé kontant mon péi !

Na lo rèv in domin dan mon Fonnkèzri

Ek révolisiyon mon prop vi

Rèv la i grandi dan mwin, é li kontant amwin minm !

Mwin la pa révé gran matin..

Mé mwin va révé po mwin domin

Ma rèv mon pli zoli

Ansréti mon Lotonomi... »

Lotèr : Ingrid Varon Fonnkèzèz

Avril 2013

Kontakt : fonnkezri@gmail.com

<http://monfonnker.blogspot.com>